

Nuna ataatsimoorfiusoq, toqqissisimanartoq ineriartortorlu

Naalakkersuisut Siulittaasuata Kim Kielsenip Inatsisartut 2015-imi ukiaanerani ataatsimiinnerat ammarlugu oqalugiaataa

(Oqaatigineqartut atuupput)

25. september 2015

Aallaqqaasiut

Ataqinartut Inatsisartunut ilaasortat, Inatsisartut Siulittaasuat, innuttaaqatillu. Inatsisartut 2015-imi ukiaanerani ataatsimiinnissaat ammarlugu oqalugiarsinnaagama nuannaarutigaara.

Inatsisartut sulineranni ukioq nutaaq aallartippoq, Naalakkersuisullu Kalaallit Nunaata siunissaa innuttaasullu atugarissaarnissaat periarfissaqarnissaallu pillugit Inatsisartuni ukiaanerani isumaqtiginninniarnissat aalajangiinissallu pingaaruteqartut qilanaarivaat.

Ataatsimoorneq, toqqissisimaneq ineriartornerlu. Partiit Naalakkersuisuutaqartut isumaqtigiissutaanni tamanna qulequtaavoq. Pisariaqartitatsinnik siuariartortitsiniarutta nunatsinni aningaasaqarnerup inuussutissarsiuteqarnerullu nukitorsarneqarnissaat pisariaqarpoq. Maanna siunissamilu nunatsinni aningaasaqarnikkut ilungersunartorsiornitta eqqarsarluarluta eqqortunik aalajangiisariaqalersippaatigut. Siuariartorneq pilersinniarlugu iluamik aningaasaliisariaqarpugut, saniatigullu siunissami unamminartut naapissinnaanissaannut nukissaqarumalluta aaqqissusseqqittariaqarluta.

Inatsisartut ataatsimiinneranni matumani oqaluuserisassat takutippaat akisussaaffeqarnerput ilisimaaralugu Naalakkersuisut naammassisassagut eqqumaffigigigut. Inuiaqatigiinni isumaginninnikkut oqimaaqtigijinnerulersitsisussanik aningaasaqarnikkullu pingaarnersiuinissamut aningaasaliinissamullu periarfissiisussanik aaqqissusseqqinnissamut siunnersuuteqarpugut. Inatsisissanik aalajangiinissanillu siunnersuuteqarpugut aningaasaqarnitsinnik, siuarsaanissatsinnik suliassaqartitsilernissatsinnillu pitsaanerulersitsisussanik. Minnerunngitsumik inuussutissarsiutit ineriartortinnissaannut innuttaasunillu sullissinitta pitsaanerulersinnissaanut iluaqutaasunik siuarsaanissamik attaveqaqtigijinnermillu pingaarnersiuisumik aningaasaqarnermut inatsisissatut siunnersuuteqarpugut.

Patajaatsumik aningaasaqarnikkut ineriartortitsiniaraanni pingaarnersiuisoqartariaqarpoq aalajangiisoqarlungilu, naak tamatigut nuannersuinnaaneq ajoraluertoq. Qularutigineqassanngilarli Naalakkersuisut akisussaaffimmik tigusinissatsinnut pisariaqartunillu aalajangiinissatsinnut piareersimagatta.

Aningaasaqarnikkut ineriartortitsinissamut siuarsaanissamullu Naalakkersuisut aqqutissiuilereerput. Suliassaq pinarpoq, tuaviutissanngilarpulli. Sipaarfingisinnaasatsinni sipaassuugut siuarsaaffigisinnaasatsinnili ineriartortitsiffigisinnaasatsinnilu aningaasaliissalluta. Allannguinerit ullormiit ullormut pinavianngillat, aallartereerpugulli.

Aningaasaqarneq

Naalakkersuisut neriuutigaat naatsorsuutigalugulu aningaasanut inatsisissatut siunnersuummi nunatta aningaasaqarnikkut ilungersunartorsiernera Inatsisartuni partiit tamarmik akisussaaffimmik tiguseqataassasut. Massakkut aningaasaqarnikkut ilungersunartorsiulereernitta amerlasuunit paasineqarsimanera Naalakkersuisut aningaasanut inatsisissatut siunnersuutaannut quisuariaatit takutippaat. Aningaasaqarnikkut inuiqatigiinnullu ataavartunik aaqqiisoqarusunnera

aamma paasinarpooq. Taamaammat Naalakkersuisut aningaasanut inatsisissamik isumaqatiginninniarput ukiuni tulliuttuni politikkikkut sapinggisamik amerlanerpaanit akisussaaffeqaqatigiissumillu isumaqatigiissuteqartoqarsinnaanissaq anguniarlugu. Naalakkersuisut aningaasanut inatsisissatut siunnersuataat siunnersuutaavooq Inatsisartuni partiinut isumaqatiginninniutigineqartussaq. Akisussaassuseqartumik aningaasaqarnikkut oqimaaqatigiissitsiniarluni sapinggisamik amerlanerpaat isumaqatigiissuteqarnissaat Naalakkersuisut aalajangiusimavaat. Taamaammat aningaasartuutissanik nutaanik isertitassanilluunniit ikilileriniarluni kissaateqaraanni qanoq allatigut matussusiisoqarsinnaanissaanik siunnersuuteqartoqartariaqarpoq.

Naalakkersuisut upperaat apeqqutinut angisuunut Inatsisartuni maanna isumaqatiginninniutigineqartussanut tunngatillugu ataatsimoorluta piumassuseqarlatalu isumaqatigiissinnaasugut. Naalakkersuinikkut sulinitssinni tunngavigissavarput:

- Ineriartortitsinissamik periarfissiinissamillu pilersitsiniarluta nunatta inuinut akisussaaqataanerput,
- Siuariartiortitsiniarluta inuussutissarsiutit pitsaasunik atugassaqartinnissaat qulakkeerniarlugu akisussaaqataanerput,
- Suliffissaaleqisut suliffissaqalernissaannut piginnaasaqarnerulernissaannullu periarfissiinissamut akisussaaqataanerput,
- Aaqqissuusseqqinnissallu pisariaqartut naammassinissaannut akisussaaqataanerput.

Ataatsimoorluta angusaqarsinnaavugut. Taamaammat Inatsisartuni ukiaanerani isumaqatiginninniarluta ataatsimiinnissatsinnut qilanaarpugut.

2016-imi 2017-imilu aningaasanut inatsisissami amigartoorteqarnerit annertusissanngillat, qinigaaffimmilu matumani aningaasanut inatsisit ataatsimoortillugit oqimaaqatigiinnissaat qulakkeerneqassaaq. Sullissinermi nalinginnaasumik pitsangorsaanissamut akissaqanngilagut, naak ilumoortumik naleqquttumillu pisariaqartitsisunik tikkuagassaqarluuarluta. Taamaammat Inatsisartut Naalakkersuisullu ataatsimoorlutik pingaarnersiuillutillu ilungersunartunik aalajangiisariaqarput.

Ukioq manna avaleraasartoorniarneq naatsorsuutigineqartumit annikinneruvoq, tamannlu aalisarnermik inuussutissarsiummi Landskarsimilu malugineqarsinnaavoq. Tamanna nammineq aquassinnaanngisatsinnik allanngortoqarneranut naleqqussarsinnaaniarluta aningaasanut inatsimmi allatut pingaarnersiuisariaqarnissamut inissaqartitsisariaqarnitsinnut assersuutaavoq. Aalisarnerup ingerlarnga Naalakkersuisut malinnaaffigaat avaleraasartoorniarnermiillu isertitassatut naatsorsuutigisimasavut ikilisariaqarpavut. Misilitakkavut ilinniarfigisariaqarpavut. Taarsiullugu 2016-imi isertitassat allat ilorraap tungaanut aallartitsippu. Aningaasanut inatsisissatut siunnersuutip oqaluuserineqarnerani akitsuutit allanngortinneqarnissaat pillugu partit kissaataat pillugit oqaloqatigineqarnissaannut atatillugu Naalakkersuisut tamatuminnga eqqartuissapput.

Naalagaaffimmit ukiumoortumik tapiissutit naleerukkiartorput, tapiissutit akinut nalimmassarneqarnerat akit aningaasarsiallu ineriartornerannit appasinnerummata. Naalakkersuisut Namminersorlutik Oqartussat ingerlanneqarnerannut allaffissornikkullu aningaasartuutinut ukiuni tulliuttuni sipaarniarluni taamaammat siunnersuuteqarput.

Pisortani ineriertorneq

Pisortani aningaasaqarnikkut atorluaanerusariaqarpugut, assersuutigalugu Namminersorlutik Oqartussani kommunenilu marloqiusamik allaffissornerup pinaveersimatinneeratigut. Suliassat kommunenut tunniunneqarnissaat kommunellu suliakkinneqarnissaminut piareersimanissaat piareersassagatsigu ataatsimoorluta ilisimavarput. Periarfissaqartillugu kommunillu ataatsimoorluta aaqqiissutissarsiniassuugut. Ukiemoortumik tapiissutit pillugit nutaamik isumaqatigiissut aqqutissieqataassaaq.

Namminersorlutik Oqartussat assigalugit kommunit aningaasaqarnikkut ilungersunartorsiorput, ilaatiqut innuttaasut katitigaanerisa malunnaatilimmik allannguuqeqrarnerat pissutaalluni. Tamanna piffissaq ungasinnerusoq eqqarsaatigalugu suliassaqarfiillu akimorlugit pilersaarusiorsinnaanissamut aningaasaqarnikkullu pitsaanerusumik aqutsissutissaqalernissamut piumasaqaatitaqalersitsivoq. Piumasaqaatit naammassiniarneranni Nuna tamakkerlugu pilersaarut sakkussaavoq pingaarutilik. Missingersuutit pillugit inatsisip 2016-imi aamma allanngortiternissaanut Naalakkersuisut piareersaapput. Naalakkersuisut pilersaarutigaat missingersuutit pillugit inatsisip allanngortitikkap pisortani tamani, tassa Namminersorlutik Oqartussani kommunenilu, aningaasaqarnikkut aqutsineq naleqqussassagaat. Pisortani pingaaernersiuisoqarsinnaanissaanut, aningaasartuutit pitsaasumik aqunneqarsinnaanissaannut, kommunenilu Namminersorlutilu Oqartussani aningaasaqarnikkut ataavartumik ineriertitsinissamut qulakteerinninnissamut sakkussanut pingaarutilinnut ilaassalluni.

Kommunerujussuanngortsinerit innuttaasut ulluinnarni atugaannik malunnaatilimmik allanngortitsisimancerat qularutissaanngilaq. Ilaatigut pitsanngoriaateqarput, tassami kommunit suliassanik annertunerusunik kivitsisinnaalersimapput. Kommuunerujussuanngortsinerni unammilligassanik aamma pilersitsisimapput. Pisortat aaqqissugaanerisa nalilersorneqarneranni, ilaatiqut nalilerneqarpoq najukkami oqartussaaqataanerup ajornerulersimanera illoqarfiiq qitiusut avataanni innuttaasunit misigineqartoq. Tamanna aamma erserpoq kommunip avinneqarnissaanut innuttaasut Qaasuitsup Kommuniani 2013-imi taasitinneqarmata. Taamaammat aaqqissusseqqinnerup sunniutaasa pitsaasut atorluaneqarnissaat illuatungaani lu najukkami oqartussaaqataanerup naammaginartunngortinnejarnissaanut kommunet Namminersorlutilu Oqartussat oqitsuinnaanngitsumik suliassaqarput. Illoqarfinni nunaqarfinni lu atugassarititaasut ilungersunartut pillugit innuttaasut suleqataatinnissaat naalakkersuinikkut ataatsimut suliassaavoq. Naammaginartumik atugassaqarnissaat qulakteertariaqarparput.

Kommunit avinneqarpata imaanngilaq najukkami oqartussaaqataanermik pitsaanerulersitsisoqartoq, avitsinermilu aningaasartuuteqarnissaq aaqqissuussaanikkullu nutaanik unammilligassaqarnissaq naatsorsuutigineqartariaqarluni. Kommuneni mikinerni avitsisoqassagaluarpat suliassanut kommunit kivitsisinnaanerannut aamma sunniateqassaaq. Taamaammat tamanna nuna tamakkerlugu sunniateqartussaavoq, kommunemut illoqarfimmullu kisimi pinnani.

Apeqquuit tamakku kommunet peqatigalugit oqaluusereqqinnissaannut qilanaarpunga, partiillu qanoq isumaqarnerat Naalakkersuisut tusarusuppaat, Naalakkersuisut suleriaqqinnissaminni isummat atorumallugit.

Sukarsuit sisamat

Inuussutissarsiornermi sukarsuit sisamat pingaartinnissaat Naalakkersuisut aalajangiusimavaat: Aalisarneq, suliffissuaqarneq, aatsitassarsiorneq takornariaqarnerlu. Saniatigut ilinniartitaanikkut immikkut iliuuseqarneq ingerlaannassaaq. Pineqartuni tamani ineriertitsineq ingerlaannassaaq, tassaniippummi suliassanik, tunisassiorernik siuariartornermillu pilersitsineq. Naalakkersuisut

anguniarpaat aningaasat agguarneqartartut amerlanerulernissaat tunniussinnaasat amerlanerulersinniarlugit. Nunatsinni kissaatigisatsitut siuariartorneq ineriartornerlu angussagutsigit patajaatsumik aningaasaliiffigiuminartumillu atugassaqartitsilernissaq uagut qinikkat suliassaraarput.

Aalisarneq savaateqarnerlu

Aalisarneq nunatsinni inuussutissarsiuini pingaarnersaavoq. Taamaammat aalisakkap annertunerusumik atorluarsinnaanissa, aalisakkat assigiinngitsut amerlanerusut atorluarsinnaanissaat imartattalu annertunerusup atorluarsinnaanissa pikkorinnerulerfigisariaqarparput. Oqaatigereerpara oqaatigeqqissavaralu. Kalaallit Nunaat innuttaasut amerlassusaannut agquaqatigiissillugu imartarujussuaqarpoq pisuussuterpassualimmik, aningaasarsiorfiginerusinnaasatsinnik. Imartarput aalisagaativullu pillugit ilisimasavut killeqarput. Tamanna allanngortittariaqarparput. Taamaammat Pinngortitaleriffiup misissuisarnerinut Naalakkersuisut aningaasaliinerorusupput tunisassiorfiillu aalisakkap annertunerusup atorluarnissaanut piumasaqarfagalugit. Naalakkersuisut isumaqarput tamaannak suliniarneq eqqortuusoq.

Ilisimaneqareersutut avaleraasartoorniarneq naatsorsuutigineqartutut ukioq manna ingerlangilaq. Tamanna nikalluutigissanngilarput. Uagut aalisarnermillu inuussutissarsiuuteqartut ilisimasaqarnerulerumalluta misilitakkani katersiuassuugut, tamannalu aatsaat anguneqarsinnaavoq iliuuseqartuarnikkut. Tunumi kitaanilu qeeraasanik, aalisakkanik allanik ikerinnarsiortunillu misileraalluni aalisarnerit soqtiginaatilimmik ineriartorput. Pisuussutitsinnik uumassusilinnik atorluaanitta siunissami siammassinneulernissaat, taamalu ataasiakkaanik inuussutissarsiuuteqartariaqarnitsinnik annikillisaanissaq, neriuutaavoq.

Nunat kangitsinni sanilerisagut – Island Savalimiillu – uatsinnut sanilliullugit aalisagaq annertunerujussuaq tunisassiarisarpaat. Immaqa eqqortumik misilitgalinnik isumassarsialinnillu pisuussutitsinnik atueriasitsinnik misissuisussanik atorluaanerunissatsinnillu siunnersuusiorsinnaasunik aggersaasinnaanissarput eqqarsaatersuutigisinnaavarput. Upperisariaqarparput, allat aalisakkamik atorluaanerusinnaappata aningaasarsissutigisinnaanerullugu, taava uagut aamma sapinngilagut!

Naalakkersuisut siunertaraat pisuussutitta uumassusillit nalitunerulersinnissaat. Aalisarnermut inuiaqatigiinnilu aningaasaqarnermut iluaqutaasumik misileragassanik atorneqanngitsunik periarfissaqarsoraarput.

Alisarnermut inatsisip allanngortiterneqarnera piffissartoqaluni ingerlavoq, aalisarnermik inuussutissarsiuuteqartut illuatungeriit tamaasa suleqatigalugit ingerlanneqartoq. Soqtigisallit amerlaqaat assigiimmik isumaqartuaannanngitsut; kisianni ataatsimoorneq angusaqarfiusarpoq Naalakkersuisullu angusaqarluarnissarput pingartippaat.

Nunalerineq silaannaap pissusaanit sunnertiasuuvoq. Savaateqarnerup nukittunerulerluni imminut napatilluni pisortanit tapiissutaarukkiartuaarnissaa inerisarlugulu annertunerulersinnissa Naalakkersuisut tapersersormassuk qularutissaanngilaq. Ilai inuussutissarsiuertik takornarialerinerlik tapertaqartittarpaat, arlaalu pinngortitap tunniussinnaasaanik inuussutissalerisarlutik arlallillu ataavartumik nukissiuuteqarput. Nassuerutigissavarpulli inuussutissarsiummi nutaaliortoqarlunilu inerisaasoqartariaqarmat. Inuussutissanik avataanit eqqussuinerit annikillisarniarlugit nunalerinermi periarfissat atorluarniarutsigit aningaasaliinerit

pisariaqarput, malitsigisaanillu suliffissaqartitsinermut imminullu pilersorsinnaanermut nukittorsaataassalluni.

Aatsitassat

Nunatsinni aatsitassanik piaaffeqaqqilernera Naalakkersuisut nuannaarutigaat. Qeqertarsuatsiaat eqqaanni rubininik tunisassiorluni piaasoqalingajalerpoq. Tamanna 60-80-inik aalajangersimasunik suliffissaqartitsissalluni.

Kangerlussuarmi Anorthosit-imik piaasoqalernissaanut Naalakkersuisut qaammat manna aamma akuersissuteqarput, aappaagu aallartittussamik. 60-it tikillugit sulisoqarnissaa naatsorsuutigineqarpoq.

Aatsitassarsiornermi ineriertorneq allanngorortorujussuuvoq, taamalu ukiualunnguaannarnulluunniit pilersarusiornissaq ajornakusoorluni. Soqutiginninnerujussuaq akillu qaffasissut maanna illuanut ingerlavoq, taamaammallu aatsitassarsiornissamut suliniutinut aningaasaliisussarsiorneq kipiluttunarluni. Pissutsit erloqinaraluartut taamaattoq aatsitassarsiortut nunatsinnik soqutiginninnerat attatiinnarneqarpoq. Aatsitassarsiornermi ineriertornerup atugassarititai pitsangorsarniarlugit Naalakkersuisut taamaammat suliniuteqarput, Kalaallit Nunaanni aningaasaliinissap soqutiginarlunilu unammillersinnaanissaa attatiinnarneqaqquillugu.

Aatsitassanik uranimik akulinnik piaasoqanngivinnissaanik Inatsisartut atorunnaarsitsinerat Naalakkersuisut malitseqartippaat. Aatsitassanik uranimik akulinnik aatsitassarsiortoqarsinnaalernissa periarfissaalersinniarlugu Naalakkersuisut ukiaq manna ataatsimiinnermi arlalinnik siunnersuuteqarput. Iluatigut qinngorernut ulorianartunut illersornissamut inatsit nutaaq nunanilu tamalaani isumaqtigiiissutinut assigiinngitsunut akuersinissaq siunnersuutigineqarlutik. Aatsitassarsiomerut Inatsit malillugu piaaneq ingerlanneqassalluni. Tamanna qularutigineqassanngilaq.

Innuttaasut annikitsumik aatsitassarsiorusuttut aatsitassarsiornissaminnut periarfissarissaarnerulerput. Qeqertarsuatsiaat eqqaanni sumiiffiit annertuut marluk rubineqarfiusut ammarneqarnissaat Naalakkersuisut juulimi aalajangerpaat. Naalakkersuisut naammagisimaarpaat aatsitassarsiornitta ineriertortinnerani innuttaasut taamaalillutik periarfissaat annertusimmat.

Nunatta aningaasaqarnikkut nammineernerulernissaanut aatsitassarsiorneup tunniussaqarnerusinnaalernissa Naalakkersuisut pimoorullugu sulissutiginiarpaat. Aatsitassarsiortunit Landskarsip isertitaqarnerunissa qulakteerneqaannassanngilaq, aamma aatsitassarsiortut inoqarfinni najugaqartunut piginnaanngorsaanissaat suliffissaqartitsinissaallu, najukkanilu inuussutissarsiuteqartut peqataatinneqarnissaat aamma pingaarutilerujussuuvoq, Kalaallit Nunaata aatsitassaatisinnit annertunerpaamik pissarsissuteqarsinnaanissaa qulakteerneqassalluni.

Ingerlatsiviit

Inuussutissarsiutit allat assigalugit Namminersorlutik Oqartussat ilaannakortumik tamakkiisumilluunniit ingerlatsiviutaat erseqqissunik nalorninaatsunillu atugassaqartariaqarput. Ingerlatsiviit piffissaq ungasinnerusoq eqqarsaatigalugu pilersarusiorsinnaasariaqarput taamaalillutik aningaasaliinernut inerisaanernullu nalinginnaasumik aningasartuutikillisaasinhaassallutik. Piffissamut ungasinnerusumut pilersarusiorsinnaanikkut suliffeqarfiit siuariartitsinissamut, ineriertitsinissamut isertitaqarnerulernissamut, taamalu aamma suliffissaqartitsinerulernissamut, pitsaanerusumik tunngavissaqalissapput.

Nunatta tatiginartumik nalorninaatsumillu aningaasaqarnikkut ingerlatsinermigut nunarsuarmioqatitsinnut, soorlu aningaaserivinnut, aningaasaateqarfinnut assigisaannullu kiisalu nunani allani soorlu EU-mi aningaasaliisartunut, akisussaassuseqartumik takutitsisinnaasariaqarpoq.

Namminersorlutik Oqartussat ingerlatsiviutaasa sapinngisamik nukittunerpaajunissaat qulakkeerniarlugu ingerlatsiviit pikkorissunik aqutsisoqartippavut. Aqutsisut katitigaanerat pitsaanerpaajutinnissaat eqqumaffigivarput. Aqutsisut nunatsinni pissutsinik ilisimasaqarput. Kisianni aamma nunarsuarmioqataanermik nunatsinnilu niuernermik soqutigisaqartunik ilisimasaqarput.

Nunanut allanut tunngasut

Aningaasaqarnikkut nammineernerulernissamut ingerlanermi Namminersorlutik Oqartussat nunanut allanut attaveqarnermik suliaqarnerat niuernermut nunanilu allani aningaasaqarnikkut suleqateqarnermut samminerulerlaluttuinnarpoq.

Kalaallit Nunaanni puisinniarneq pillugu EU-mi paasinninnerulernissaq Naalakkersuisunit ukiuni kingullerni pingaaqtinnejarpooq. Naalakkersuisut neriuutigaat nunatsinni puisinniarnermik inuussutissarsiuteqarneq Europami isertitsissutaallualeqqikkumaartoq. Puisinniarsinaajumalluta puisillu amiinit tunisassiorsinnaajumalluta EU-mi suliniuteqarnitsinni Nunat Avannarliit tapersorsorpaitugut.

Nunani avannarlerni suleqatigiinneq Naalakkersuisut pingaaqtippaat. Nunani avannarlerni ministerit siunnersuisoqatigiivini Danmarkip siulittaasuunerani suliniarnerit arlaqartut nunatsinni malugineqarsinnaapput. Nunani avannarlerni ministerit siunnersuisoqatigiivini Danmarkip siulittaasuunerata Nunani avannarlerni politikkimut kalaallit sunniuteqarnissaminut periarfissinneqarput. Assersuutigalugu “Det Blå Arktis”-imik taallugu siulittaasuunermi imaq imaanilu pisuussutit pingaaqtinnejarpooq. Pinngortitaq pisuussutillu uumasusillit pillugit piniartut aalisartullu ilisimasaannik katersilluni suliniut Nunanit Avannarlernit tapersorsorneqarpoq.

Nunanut allanut politikkeqarnermi Nunani Avannarlerni suleqatigiinneq pingaaruteqarpoq. Nammineerluta akisussaalluta peqataasarpugut, Kalaallit Nunaatalu nunarsuup immikkoortuani nunanilu tamalaani politikkia siuarsarniarlugu Naalakkersuisunut ilaasortat amerlanerit suleqataapput. Pitsaasumik malunnaateqarnerput nammineerluta pilersissinnaavarput attatiinnarlugulu.

Nunat allat Kalaallit Nunaannik Issittumillu soqutiginninnerisa Kalaallit Nunaannut nunatsinnilu inuussutissarsiuteqartunut aningaasarsioritsisinnalernissaat nunanut allanut ukiuni makkunani politikkeqarnermi qulakkeerniarneqarpoq. Pitsaasumik soqutigineqarnitsinnik nammineerluta pilersitseqataasinnaavugut attasseqataasinnaalltalutu.

Silap pissusaa pillugu nunarsuarmioqatigiit COP21-mik taallugu ataatsimeersuarnissaannut Frankrig decembarimi qaaqqusisuusussaavoq. Frankrigimi nunanut allanut ministeri marsimi Ilulissaniimmat Danmarkimi nunanut allanut ministeri peqatigalugu Naalakkersuisut qaaqqusisuupput. Silap pissutaata allanngoriartornerata nunatsinni nunarsuullu sinnerani sunniutai immap qaffakkiartorneranik silarlorujussuartarneranillu ilaatigut ersiuteqartut maluginiarneqarnerulernissaannut periarfisseeqataavugut. Frankrigip COP21-mut qaaqqusisuunissaanut ilanngussaqarsinnaasimanerput Naalakkersuisut nuannaarutigaat. Tikeraarneq

taamaattoq nunatsinniit pingaarutilimmik nunanut tamalaanut pitsaasumik silap pissusaata allanngoriartorneranut killilersimaarinninnissamut tapersiisoq kinguaariit siunissami attatassaannut.

Naalakkersuisut nunat Issittumi imartallit sisamat aasaq manna nalunaarusioqatigai, issittup killilersugaangitsumik aalisarfigineqannginnissaa anguniarlugu. Aalisarfigineqarsinnaasuni nunanit aalisarnermik inuussutissarsiuteqartunit allanit, soorlu Asia-mit maluginiarneqalereersuni nunani tamalaani aqutsisoqarsinnaalernissaanut tamanna alloriarneruvoq pingaarutilik.

Attaveqaqatigiinneq

Aalisarnermit avammut tunisinermik akileraarutitigullu isertitanik pinngitsuuisinnaannginnitta sanngiinnerulersippaatigut. Taamaammat nunate arlalinnik inuussutissarsiuteqarsinnaalersinniarluta iliuuseqartariaqarpugut. Aningaasaliilluarnikkut attaveqaqatigiinnikkullu pitsangorsaanikkut inuussutissarsiornermik soorlu takornariaqarnermik aatsitassarsiornermillu siuarsaanissamut aqqutissiuussisariaqarpugut.

Nunatsinni mittarfiit ineriartortinniarlugit Naalakkersuisut annertuumik pilersaarusiortput ukiaq manna ataatsimiinnermi saqqummiunneqartussamik. Nunatta ataqatigiissinnissaanut angallannikkut katerittarfiit pilersaarusiukkat pingaaruteqarput.

Pilersaarusiornikkut pitsaanerusumik akikinnerusumillu angalasinnaaneq pingarnerusumilli takornariaqarnermik siuarsaasinhaaneq piviusunngortinnejassapput. Angallanneq ukiorpassuarni misissuiffiqeqartarsimavoq, piffissangorporlu periarfissat piviusunngortinniarlugit iliuuseqarnissaq – nunarput pillugu.

Mittarfiit pillugit aalajangiiffigisassatut siunnersummut Inatsisartut akuersaernerisigut tatiginartumik, ullutsinnut naleqquttumik ataqatigiissumillu attaveqaqatigiinnermik ataatsimoorluta pilersitsissuugut. Attaveqaqatigiinneq siuariartornermik nutaanillu suliassaqalersitsinermik periarfissiisoq, inuiattullu immitsinnut qaninnerulersitsisoq.

Umiarsualivinnut pilersaarutip akuerineqarneratigut nunatsinni umiarsualivinnik ineriartortsinissamut tunngavissaqarlualerpugut, soorlu aamma aserfallatsaaliiinissamut sumiiffippassuarni ajoraluartumik takussaasimasunik aallartisaasinhaalissalluta. Sanaartornermut Iluarsaassisarnermullu Aningaasaateqarfimmi allatut tulleriaarinikkut umiarsualivinni aserfallatsaaliiinissamut kinguaattooqqaneq ukiut qulit ingerlaneranni angumeriniarpaput.

Tele Greenlandip immap naqqatigut kabelip avannamut tallinissaanik Upernavillu tikillugu atassuteqaatinut sakkortusaaviit nutaat pilersinnissaannik pilersaaruteqarnera Naalakkersuisut soqutigisorujussuaat. Taamaaliornikkut nunarput ataqatigiinnerulissaaq sukcasumik interneteqarneq inuit pingajorarterutaannaanit atorneqarunnaarluni pingasuugaangata marlunnit atorneqalissalluni. Internetsikkut nakorsiarsinnaanermut atuartitsisinnaanermut ilinniagaqtitsisinnaanermullu periarfissatsialaat piviusunngortinnejarsinnaalissapput.

Sanaartorneq

Sanaartornerup pitsaanerulersinneqarnissa Naalakkersuisut sulissutiginiarpaat – suliniutip ingerlanerani sanaartornermilu. Maanna sanaartornermit sanilliullugu sapinngisamik akisunerulersinnaveersaartissavarput, kisianni atortut sanaartoriaatsillu pitsaanerusut toqqarnerisigut aserfallatsaaliiinermut iluarsaassinermillu siunissami aningaasartutikinnerulissuugut.

Inuaqatigiinnut iluaqutaasumik sanaartornerup qanoq ineriaartortinnejarsinnaaneranut akisussaaffimmik tigusissuugut maligassiuillatalu, eqqarsarluarnikkut pinngitsoortinneqarsinnaasunut siunissami aserfallatsaaliinermut iluarsaassinerullu aningaasartuuteqarpallaannginnissaq anguniarlugu. Pilersaarusiornikkut sanaartornikkullu meeqqatsinnut ernuttatsinnullu aningaasartutissat aalajangersortussaavagut.

Namminersorlutik Oqartussat inissianik iluarsartuussinissanut kinguaattoorneri Naalakkersuisut iliuuseqarfinginaarpaat. Naalakkersuisut taamaammat siunnersuutigaat, iluarsaassiniisanut ukiuni tulliuttuni aningaasanut inatsisissanut annertuumik immikkoortitsisoqassasoq. Eqqarsarluarluni pimoorussillunilu tamanna suliassaavoq.

Iluarsagassat imminut akilersinnaasut illersorneqarsinnaasumik salliunneqassapput. Inissiat iluarsanneqareerpata eqqortumik ineqarnermut akeqartitsisoqassooq. Taamaaliornikkut nutarterinerit pisariaqartillugulu inissianik taartissanik sanaartornissat qulakkeerneqassapput. Siunissami sunik suliassaqarumaarnernik najukkani sanasut malinnaasinnaaqqullugit pilersaarusiortoqartariaqarpoq, taamaalillutik sanasut pilersarusiorsinnaalissallutik.

Suliffissaaleqinermik akiuiniarneq

Suliffissaaleqineq ajornartorsiutaavoq tamannalu Naalakkersuisut eqqumaffigaat. Naalakkersuisooqatigiinnissamut isumaqatigiissutigaarput suliffissaaleqisut ikilisarniarlutigit. 16-inik suliniuteqarnitsigut tamanna iliuuseqarfigaarput taakkulu Suliffissaqartitsinermut periusissiami “Suliffeqarneq isumannaatsumi” katersorneqarnikuupput. Suliniutit 16-it siunertaraat suli amerlanerusut imminut pilersorsinnaalernissaat suliffeqalernissaallu.

Inuusuttut akornanni suliffissaaleqinerup annikillingaatsiarnissaa Naalakkersuisut suliniutigaat. Inuusuttut ilinniagaqarnerminni unituussanngillat suliffissaaleqileratillu, kisianni siunnersorneqarlutillu tapersorsorneqassapput.

Inuusuttunut atuagarsornikkut nukittunerpaajunngitsunut ukiorpassuarnilu sulisinnaasunut suliniuteqarnissaq Naalakkersuisunut qitiulluinnarpoq. Tamanna Inuusuttut Inatsisartuini upernaaq aamma sammineqangaatsiarpoq. Taamaammat Suliffissaqartitsinermut periusissiami Piareersarfinnut aningaasaliissutit amerlineqangaatsiarput.

Nuna tamakkerlugu internetsikkut sulisussarsiorfik nittartagaq ukiup naanerani atulersussaq sakkussatsialaavoq Naalakkersuisunit qilanaarineqartoq. Suliffissarsiuussiviit nittartagaq aqqutigalugu suliffissaaleqisut nuna tamakkerlugu suliffissarsiorlugit siunnersornissaannut pitsaanerusumik sakkussaqalissapput. Suliffeqarfinni sulisut sunik ilinniagallit pisariaqartinneqarnersut nittartagaq aqqutigalugu aamma ajornannnginnerusumik takuneqarsinnaalissaaq.

Ilinniartitaaneq

Ilinniagaqarnerup qaffassarneqarnissaa ukiorpassuarni tunngaviusumik anguniagaavoq Naalakkersuisullu isumaqarput tamanna suli ukiorpassuarni pingartinneqassasoq. Naalakkersuisut nuannaarutigaat ilinniarfissat arlaqartut pilersinneqarsimammata, soorlu TNI-mi, Issittumi Teknologimik Inerisaavimmi Ilisimatusarfimmilu. Amerlanerusut ilinniagaqarpata ataasiakkaat takorluukkaminik piviusunngortinnissaannut periarfissarissaarnerulissapput.

Ineriaartorneq sukkasoorujussuuvoq malinnaaniarnerlu ajornakusoorsinnaasarluni. Inuiattut kissaatigaarput aningaasaqarnikkut nammineernerulernissarput – namminersulivinnissarput.

Naleqartitat akgalugit tamanna anguneqassanngilaq. Meeqqatsinnik perorsaanitsinni naleqartitat suut ingerlateqqikkusunnerivut eqqarsaatigilluartariaqarparput.

Meeqyat atuarfiat

Nunatsinni ilinniagaqassutsip qaffassarneqarnerani meeqqat atuarfiat tunngaviuvoq.

Naalakkersuisut kissaatigaat atuartut atuagarsiornermut inuttullu ilinniagaqarnissamut piareersarneqassasut. Meeqyat atuarfianni atuartut nukittuffii inerisarneqassapput ilinniarusussusermik ineriartorusussusermillu aallaaviusussaalluni.

Kommunenik oqaloqateqarneq aallartereeroq Namminersorlutilu Oqartussat kommunillu akornanni isumaqatigiissutigineqarpoq suleqatigiinneq nukitorsarneqarluni ingerlaannassasoq. Isumaqarpunga aaqqiissutissarsiorntsinni inini atuarfiusuni utoqqartatta patajaallisaasutut atorneqarsinnaanissaat ammaffigisariaqaripput. Utoqqartavut inuunermi misilittagaqarput atorneqarusullutilu, taakkulu atuartitsinermi atorneqarsinnaanerat ilanngunneqarsinnaapput.

Meeqyat atuarfii siorna annertuumik nalilersorneqarmata paasinarsivoq sukut pitsaanerulersitsisinnaanersugut: Atuartitsineq atuarfiullu isumassuinera pitsaanerulissaq. Atuarfimmi allaffissorneq aqtsinerlu perorsaanikkut aqtsinikkullu nukitorsarneqassapput. Ilinniartitsisut piginnaasaat atuartut pisariaqartitaannut, pissutsinut inatsimmilu piumasaqaatinut naleqqusarlugit nukitorsarneqassapput. Angajoqqaat atuartut ilikkarnissaannut atuarnissaannullu aalajangiinernut peqataatinneqarnerussapput meeqqallu toqqisisimanissaannut atugarissaarnissaannullu akisussaanerulerlutik. Allatut oqaatigalugu, tamatta akisussaaqataanerulissuugut, meerartattalu toqqisisimasumik avatangiiseqarlutik piginnaasaqarlutilu ineriartornissaat anguniarlugu iliuuseqarluta.

Ilaqutariit isumaginninnerlu

Qinigaaffimmi matuman isumaginninnikkut assigiinngitsunik Naalakkersuisut suliniuteqarput, assersuutigalugu inersimasut meeraanermanni kinguaassiuutitigut atornerlunneqarsimanerminnit kingunerlutsitsisut, persuttaasarnermk akiuiniarneq qitiusumillu meeqqat inuusuttullu pillugit kommunenut siunnersuisartut.

Inuit amerlavallaat meeraanermanni kinguaassiuutitigut atornerlunneqarsimapput. Tamanna inersumasunngornermi assigiinngitsunik kingunipiluuteqartarpoq, assersuutigalugu imigassamik hashimillu atornerluisunngorsinnaasarlutik, inuit akornanniissinnaanatik, suliffeqarsinnaanatik, allanut atassuteqarsinnaanatik nalinginnaasumillu inuunermik ingerlatsisinnanatik. Imaluunniit nammineq atornerluisunngorlutik. Kinguaassiuutitigut atornerluineq inuiaqatigiinni oqaluuserineqarnera killeqarpoq ilungersunarlunilu: qisuararfingineqanngippat unitsinniarneqanngippallu kinguaassiuutitigut atornerluineq kinguaariippassuarni ingerlaannarsinnaavoq.

Naalakkersuisut isiginnaaginnarusunngillat. Tarnip pissusaanik ilisimasallit angalaqatigiittartut nuna tamakkerlugu nunaqarfinnut illoqarfinnullu angalasarput innuttaasut kinguaassiuutitigut atornerlunneqarsimanermit kingunerlutsitsisut katsorsariartorlugit. Angalaqatigiittartoqarnera naalakkersuinikkut iliuuseqarusussusermik allanguerusussusermillu takutitsivoq.

Siusinaartumik soraarnerussutisiat

Naalakkersuisut isumaqarput sulisinnaasut tamarmik sulissasut. Siusinaartumik soraarnerussutisiaqarnerup aaqqissuuteqqinnissaanut Naalakkersuisut siunnersuuteqarnerannut

tunngaviuvoq inuit tamarmik inuiaqatigiinnut tunniussisinnaassasut, sulisinnaassusertik atorsinnaassagaat sapinngisartillu tamaat ilanngussinissamut pisussaaffeqartut.

Siusinaartumik soraarnerussutisialippassuit aalaakkaasumik ataavartumillu suliffeqalerunik pitsaanerusumik inuuneqalerlutilu atugaqlissasut naatsorsuutigaarput. Suliffeqarneq isumaginninnikkut pitsaanngitsunik kingornussanik nungutitsiartoqataasinnaavoq.

Inatsisissatut siunnersuutigineqarpoq siusinaartumik soraarnerussutisiallit 60-it ataallugit ukiullit tamarmik sulisinnaassusaat nalilersorneqassasut. Siusinaartumik soraarnerussutisiallik suleqatigalugu soorunami naliliisoqassaaq.

Utoqqalinersiat

Utoqqalinersiat aaqqissuuteqqinnissaannut Naalakkersuisut Inatsisartut ataatsimiinneranni aamma siunnersuuteqarput. Utoqqalinersiat isumaginninnikkut aningaasaqarnikkullu naleqquettunngortinnissaat Naalakkersuisut siunertaraat. Inuunertusiartortilluta piginnaasavut najoqqutaralugit piumassuseqarutta sivisunerusumik sulisinnaanissarput periarfissiuunneqartariaqarpoq. Inuiaqatigiinni pisariaqartitatsinnik utoqqartavut naleqarluartumik atorluarsinnaasatsinnillu misilittagartuujupput. Taamaammat sivisunerusumik suliinnartoqarsinnaanissa kajuminnarnerulersittariaqarpoq amerlanerusullu utoqqalinissaminut ileqqaortalertariaqarlutik.

Utoqqalinersiat pillugit inatsisissatut siunnersuummi anguniarneqarpoq tunngaviusumik utoqqalinersiaqarnissaq aningaasaqarnikkullu sannginnerit tapisiaqartinneqarsinnaanissaat. Tunngaviusumik utoqqalinersiat aapparisap isertitaanut attuumassuteqassanngillat. Utoqqalinersiallit angerlarsimaffimmik ikiorteqarsinnaanerat aamma akeerutsinnejassaaq utoqqaat sivisunerusumik namminneq angerlarsimaffimminniiginnarsinnaanerat periarfissiuunniarlugu.

Utoqqalinersiat pillugit inatsisissatut siunnersuutip tunngaviusumik ilusilersorneqarnerani innuttaasut sulerulussimasut utoqqalinersiaqalernissamik tungaanut sulisinnaanngitsut isumagineqarput. Utoqqalinersiaqalertartut utoqqaanerulersikkartortinneqarneranni ukiorpassuarni sulerulussimasut toqqisisimanartumik ikiorneqarsinnaanissaannik aaqqissuusseqqinneaq ilaqtinnejassaaq.

Peqqinneq

Ataatsimoorneq, toqqisisimaneq ineriartornerlu, pingaartitat taakku peqqinnissaqarfimmut attuumassuteqarluinnarput. Peqqinnissaqarfimmi pitsasumik katsorsarneqarsinnaanissarput pingaartitaniippuit. Inuiaqatigiit toqqisisimanassapput, aamma ikiortariaqaraanni. Ineriartorneq aamma malinnaaffigissavarput – assersuutigalugu nuna tamakkerlugu peqqinnissamut suliniutinut teknologit nutaaliat atorlugit neqeroorutigineqarsinnaasunut tunngatillugu.

Dronning Ingridip Napparsimmaviani napparsimasunut ikiortariaqarnerusunut, meeqyanut tarnimikkullu nappaatilinnut, atugassaritiat pitsangorsarneqarnissaat Naalakkersuisut sulissutiginiarpaat.

Utaqqisut ikilisarnissaat pimoorussassanut ilaavoq, soorlu aamma toqussutaasinnaasunik napparsimasunut sullissinerup pitsangorsarneqarnissa iliuuseqarfinginiarneqartoq.

Tamatta nalunngilarput napparsimatilluni asasanit ingalassimaneqarneq tuppallersaataallunilu nipaallisaataasartoq. Amerlasuut taamannak periarfissaqanngillat assersuutigalugu Danmarkimut

katsorsartikkiartorlutik aallartariaqarnertik pissutigalugu. Naalakkersuisut isumaqarput nunatsinni katsorsaasinnaalernissamut periarfissaqarpat tamanna sulissutigineqartariaqartoq.

Massakkulli nuannaarutigaarput napparsimasut angalaneranni pitsaanerusumik atugassaqartitsileratta Kangerlussuarmi utaqqisarfegalerneratigut, naalakkersuisooqatigiinnissamut isumaqatigiissummi anguniarneqartutut.

Innuttaasut peqqissusaat

Tamatta napparsimalersinnaavugut, kisianni peqqissumik inuuneqarniarluta qanoq iliuuseqarsinnaanerput isigniartariaqarparput. Innuttaasut peqqissusaannut suliniut II naapertorlugu 2015-imi timip aalatinissaa suliniutaavoq. Taamaammat Naalakkersuisut kaammatuutigaat timitta akuttualaanngitsumik aalatinissaa eqqaamassagipput meeqqattalu timersornissaat qulakiissagipput.

Innuttaasut peqqissusaat eqqarsaatigalugu peqqissutsimik misissuinerit kingulliit takutippaat pujortnikinnerulerlatalu imernikinnerulersimasugut, tamannalu nuannaarutissaavoq. Tamanna tullusimaarutigisinnaavarput. Ilanngulluguli eqqumaffigisariaqarparput inuiaqatigiinni naligiinnginneq annertusiartormat, tamannalu peqqissutsimut pitsaanngitsumik sunniuteqarluni. Naligiinnginnermut takussutissat ilagaat sanngiinnerusut ajornartorsiutitalimmik inooriaaseqarnerat napparsimalersinnaanermut toqujaarnissamullu qaninnerulersitsisinnaanerat.

Ataatsimut isigalugu imernikinnerulersimagaluarluta imigassamik hashimillu atornerluineq innuttaasut peqqissusaannut ajornartorsiutaanerpaapput. Minnerunngitsumik atornerluinerup isumaginninnikkut sunniuteqangaatsiartarnera eqqarsaatigalugu. Innuttaasut atornerluinermit katsorsartinnissaannut periarfissarissaarnerulernissaat Naalakkersuisut sulissutigaat, atornerluinermit aniguerusutt tamarmik neqeroorfigineqarsinnaanissaat qulakteerniarnerisigut.

Isumaginnittoqarfiit akimorlugit suleqatigiittariaqarpugut. Meeqananut ilaqtariinnullu suliniutit ingerlaannassapput. Toqqisisimasumik peqqinnartumillu meeraaneq pitsasumik peqqinnartumillu inersimasunissamut aallaaviuvoq pingarnerpaaq. Innuttaasut peqqissusaannut suleqatigiinneq nukittorsarniarlugu unammillermartullu eqqumaffigineruniarlugit Naalakkersuisut innuttasut peqqissusaat pillugu ukiaq manna ataatsimeersuartitsissapput.

Avatangiisitta eqqiluitsuutinnissaq qulakteerniarlugu suliniutit ingerlaannassapput. Avatangiisit pinngortitallu paarilluarnissaat tamatta akisussaaffigaarput, nunalu tamakkerlugu qanoq pitsaanerusumik eqqagassalerisoqarsinnaanera sammissallugu Naalakkersuisut pingartippaat. Avatangiisink eqqiluitsuutitsinerup tamatsinnit akisussaaffigineqarnera pillugu suliniut Qujanaq meeqananut sammitinneqarnera ingerlaannassaaq.

Naggasiut

Ataqqinartorsuup Dronningip Kunngikkormiusullu ataqqinassuseqartup dronningip uiata aasaq tikeraarpaatigut. Kunngikkormiut kalaallillu akornanni kissalaartumik qanittumillu attaveqarneq uppernarsineqaqqippoq. Naalakkersuisut Dronningi uialu qamannga pisumik qujassuteqarfiginiarpaat ilaqtariillu Kunngikkormiut nunatsinnut tikeraaqqinnissaannut tikilluaqqullugit.

Suliassarpessaqarpugut inuiaqatigiinni siuariartorneq atugarissaarnerlu pilersikkusutavut piviusunngortinniarlugit.

Naalakkersuisut Inatsisartullu kismiillutik tamanna naammassisinnaanngilaat. Tamatta piumassuseqarluta suliniartariaqarpugut. Qanorluunniimmi Tunumiugaluarutta, kitaamiugaluarutta, avannaamiuugaluarutta kujataamiugaluaruttaluunniit, aamma qanorluunniit aalisartuugaluarutta, piniartuugaluarutta, savaatiliugaluarutta, akissarsiortuugaluarutta annertunerusumilluunniit ilinniagaqaraluarutta, inuiaqatigiinni toqqisisimaneq siuariartornerlu pilersinniarlugit sulinissatsinnut tamatta akisussaaffeqarpugut.

Nunarput, Kalaallit Nunaat, nunaassaaq tamanik atorfissaqartitsisoq ikiortariaqalinnullu tapersersortariaqalinnullu ikuukkumassuseqartoq.

Taamaammat neriuutigaara Inatsisartut ukiaq manna ataatsimiinneranni innuttaasunut takutissagipput ataatsimoirluta aalajangiinissanut pisariaqartunut suleqatigiilluta akisussaassuseqarlatalu piumassuseqarnitsinnik takutitsisinnaalluta.

Henrik Lundip taalliaasa ilaanni ima allaqqasoqarpoq:

Nukiit kattuttut artuligaannik
Qanga maani tusarpugutaat?

Nangaasoornata sapiiserluta
Ajunnginneq taava pisassaassavvoq!

Taamannak oqaaseqarlunga Naalakkersuisut sinnerlugit Inatsisartut ataatsimiinneranni ullumi aallartittumi tamatta suleqatigiilluarnissatsinnik kissaappassi.

Qujanaq!